



Nuuk, 17. marts 2015

Inatsisartut suleriaasianni § 37 naapertorlugu Naalackersuisunut imaattunik apeqquteqarpunga:

(Inatsisartuni ilaasortaq Aaja Chemnitz Larsen, Inuit Ataqatigiit)

Apeqqutit:

- 1) Psykiateri qaratsamigut ajoqusersimasooq 2005-2006-imi katillugit sapaatit akunnerini qulingiluani immikkut ilisimasalittut nunatsinniissimanermini napparsimasunik qassinik nappaataannik suussusersisimava?
- 2) Psykiateri qaratsamigut ajoqusersimasooq 2005-2006-imi katillugit sapaatit akunnerini qulingiluani immikkut ilisimasalittut nunatsinniissimanermini napparsimasunik qassinik nakorsaatitigut nakorsaasimava?
- 3) Napparsimasut taakkua nappaammikkut nutaamik suussusersineqarsimappat?
- 4) Napparsimasunut pineqartunut psykiaterimit tassannga nakorsarneqarsimasunut Naalackersuisut allakkatigut saaffiginninnialersaarpat?
- 5) Dronning Ingridip Napparsimmavissuani qaratsamigut ajoqusersimasumik psykiatereqarsimaneranut tunngatillugu innuttaasut ataatsimut isigalugu paasissutissinneqassappat?
- 6) Napparsimasut pineqartut nutaamik naliliiffigineqarnissaminut periarfissinneqarnissaat qulakkeerneqassava?

Tunngavilersuut:

Peqqinnissaqarfimmi napparsimasup immikkullu ilisimasallip akunnerminni tatigeqatigiinnissaat pingaaruteqarpoq. Taamaattumillu innuttaasut Peqqinnissaqarfimmit sapinngisamik pitsaanerpaamik nakorsarneqartarnissaat, nakorsarneqarnerullu eqqortuuneranik naatsorsuuteqarnissaat pingaaruteqarput.

§37 naapertorlugu apeqquteqaammut 13. marts 2015-mi akissummi erserpoq, psykiateri qaratsamigut ajoqusersimasooq Dronning Ingridip Napparsimmavissuani 2005-2006-imi katillugit sapaatit akunnerini qulingiluani sulisimasooq. Taamatut immikkut ilisimasallit aggerinneqaraangamik napparsimasunik amerlasuunik nappaataannut suussusersinernik, nakorsaasersuinernik nakkutilliinernillu aallusaqartarput. Taamaattumillu napparsimasut qassit psykiaterip taassuma nunatsinniinnermini nakorsarsimanerai, kukkusumillu suussusersisimasooqarsimannginneranut kukkusumillu nakorsartittoqarsimannginneranut Naalackersuisut qanoq qulakkeerininniarnersut paaserusuppakka.

Pisaaq danskit tusagassiorfiinit sukumiisumik misissorneqarsimavoq, tassanilu paasineqarpoq napparsimasut toqqaannartumik attavigineqarsimasut nutaamillu naliliivigineqarnissaminut periarfissinneqarsimasut. Psykiateri taanna maani atuussimammat aamma tamanna kalaallinut innuttaasunut atuuttariaqarpoq.

Innuttaasut Dronning Ingridip Napparsimmavissuanit ikioqqusut nunamit tamarnit aggersuusarput. Napparsimasut taakkua immikkut qajannartuusarput, kukkusumillu nappaatimikkut suussusersineqarsimanerminnut imaluunniit kukkusumik nakorsarneqarsimaninnut namminneq immikkulluunniit ilisimasalittut pasitsaassaqarsimanngikkunik paasineqanngisaannarsinnaapput. Taamaattumillu

namminneq naammagittaalliornissaminnut isumaliuuteqassanngillat, kukkusumilli
nappaatimikkut suussusersineqarsimasinnaanermut imaluunniit kukkusumik
nakorsarneqarsimasinnaanermut paasissutissinneqarnissaminnut pisariaqartitsillutik.

Apeqqutima ullut suliffiusut qulit iluanni akineqarnissaat kissaatigivara.